

# ЛУИМА СЭРИПОС

18 декабря  
2015 года  
№24  
(1114)

www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года



Ты хурит Евгения Вьюткина пöсым öлы.  
Тав Ханты-Мансийск үст «Товары земли Югорской» нампa ярмаркат  
лүптаң шай тыналас. Ты урыл 8 лөпсыт ловиньтэн.

Ты  
номерт  
ЛОВИНЬТЭН:

Округув  
85 тälэ  
янытлавес

2

Тәрвитың äгм  
öщнэ хөтпат  
нөтавет

5

Соссаң мир  
ялпың хөталт  
мүйлысыт

9

Щань лätңыл  
потрыт  
вос хансөв

11

Мäхум өт тав  
өмас номтыл  
öлыс

15

## Округув 85 талэ янытлавес

Ты этпос 10 хоталэт округув намхоталэ янытлан кастыл Совет Федерация кұшай Валентина Матвиенко, Россия Президент палыл УРФо мат кұшай Игорь Холманских, Тюменский область губернатор Владимир Якушев, Ямал губернатор Дмитрий Кобылкин ос Государственный Дума палыл депутаты туг җхтала-сыт.

Ялпың хоталт мир җт ишхипың ут хосыт Москва ос Тюмень җсыг потыртасыг. Москваныл Александр Филипенко округувт олнэ махум янытласанэ. Округувныл Тюменьн олмыгтам матумпала хотпат акван ос атхатыгласыт. Тан пуссын Югран паща латың кетсыт, тан мав

сымыңыш номияныл ос җруптыяныл.

Валентина Матвиенко Россия экономика тэланэ нох-лаплан магыс округт рупитан махум җсгысанэ. Савмирыт аквҗёт юртыңыш олнэныл магыс җмас латың лавыс ос това хотпат яныг муйлупсал мисанэ. Тан халаныл кит маньшииг олсыг, тыи Руслан Проводников ос Светлана Динисламова.

Игорь Холманских Россия Президентув Владимир Путин кетум пищматэ ловиньта-стэ ос ма-вой нох-винэ хотпат муйлупсал мисанэ. Россия Правительство кұшай Дмитрий Медведев округувт олнэ махум ос янытласанэ. Тав кетум латҗе Ната-



И. Холманских, Н. Комарова

лья Комарован ловиньта-вес. Тувыл кұшай нэ сав хотпа яныг нам олнэ посыл муйлуптасанэ. Хонтаң маньши ойка Анатолий Прокопьевич Кауртаев ос «Сургутнефтегаз» компани-

ят рупитан хум Иван Айдуллин «Почётный гражданин Ханты-Мансийского автономного округа – Югры» яныг намыл майвесыг.

Тамара МЕРОВА

## Кол җнттын ма пентсыл олн миңкв патаве

**Ват саграпнал этпос депутатыг олнэ**  
**Вмахум йильпи саккон пирмайтасыт.**  
**Ань сав няврамың колтаглыт кол җнттын**  
**магыс ма-ломтыл мивет.**

Ос миркол кұшаит тамле вармалън җрымыс – округув янытыл кол җнттын ма атим. Сав няврамың щемьят матах тал очердит такос җрхатэгыт, ос тэланыл нэматыр элалъ ат лакви.

Таиммагыс кұшаит ты тарвитың вармалъ җт ань мот щирыл элалъ рупитаңкв патэгыт. Яныг колтаглыт ма пентсыл тан олныл тах мыганыл. Ань ты мус округ мирколт кұшаит җмашакв ловиньтасаныл, хоты щемья манах солковил миңкв

эри. Тара ты патыс – манах няврам щемья олныш, та щирыл олныл тах миве.

Ос йильпи сакконнын тасавит олн ты хасвес – 1 млн 200 сотыра солковиныл – 3 млн 600 сотыра солкови мус. Тыгыл савнув тан олн тах ат мыгыт. Щар сав няврамың колтаглыт тан ты сав олныл таставет.

Ань ты вармалъ таи магыс оснэҗлыс, това щемьят ма-ломтыл мивет кос, ос кол җнттын магыс тан олн щар ат олнэҗгыт. Банкыт

кредит-олныл ат мивет, рушит лавнэныл холът – тан «доход» тал олэгыт, моща олн сэлэгыт.

Ань ты саккон щирыл элалъ тох варае, 2016 тал овылтахтын юи-палт тал котиль этпос овыл хоталэныл ты олн виңкв касащан колтаглыт заявление-нэ пак хансуңкв лававет. Ты заявлени-ят туп хот этпос сыс атуңкв патавет.

Тувыл ты вармалъ җл-побилттаве, округув янытыл акв очередь варае. Тонт касащан щемьят нэпаканыл җмашакв уральтавет, ос лававет – хоты щемья манах олныл миве.

Валентина  
ВАСИЛЬЕВА

## Сосаң мир Ассамблея урыл йильпи саккон

Ты этпост округ Дума рупитам порат тамле саккон хасвес – ань элалъ кос хоты хотпа Ассамблеян перияхтуңкв вёрми. Ты элы-палт туп маньши ман ханты хотпа тот рупитаңкв вёрмыс.

Ты йильпи саккон пирмайтан магыс округ Уставн (ман округувтты шар мак яныг саккон) ты урыл ос хасвес. Тот «маньши» латың ос «ханты» латың хотшуртумтавесыг.

Надежда Геннадьевна Алексеева лавыс, ты саккон таиммагыс тох хасвес, ман округув Тюменский область нупыл моляхнув вос хансае.

Валентина  
ХОЗУМОВА



## ЛҲХХАЛЫТ

## Ханищтан мӕхум янытлавёсыт



Ёпаспалнупыл Е.П. Максимова лӕли,  
Нижневартонск усшколат сав тал рупитас



Ёпаспалнупыл ханищтап вӕрмалъ  
Департамент кушай Л.Н. Ковешникова пӕлым ӕлы

**Я**ныг таквс ӕтпос 27 хӕталӕт Ханты-Мансийск ӕст Центр искусств колт нӕврам ханищтан мӕхум янытлавёсыт. Ты хӕнтхатыглап округув ялпын хӕталӕ кастыл вӕрыглавес, намаывес: «Учителями славится Югра».

«Заслуженный учитель» нам ӕцнӕ атсӕт арыг хӕтпа тув атхатыгласыт. Округ Дума кушай ваӕын хум Сергей Юрьевич Дегтярёв тӕва хӕтпат янытлан нӕпакыл мисанӕ, тав лӕвыс: «Нӕврам ханищтам ос ань школатыт рупитан ятил

хӕтпанув, мӕн Дума депутатыт нӕнан округ ялпын хӕталӕтыл янытлыанув! Сӕв ӕмас, сымын лӕтын лӕвӕв!

Кӕсынув таве ханищтам ӕмас хӕтпа номтӕт ӕнъшитӕ. Тав мӕтратӕ, ӕре, вӕрнӕ тӕланӕ нӕмхуньт ат ӕрувлахтӕгыт. Нӕврам

ханищтан кӕсын хӕтпа наме сов хольт Тӕрумт посты.

Ханищтан мӕхум сака сӕв рупитӕгыт, таимӕгыс тӕн кушаит хольт номтыӕт, кос маныр урыл китапахтӕв, тӕн пуссын вагыт. Нӕврамыт нӕнанн вос хунтлӕгыт, вос ӕруптавӕн. Пуссын пустагыл ӕлӕн, сӕтыӕыщ ӕлӕн!».

Округ янытыл ханищтан вӕрмалъ Департамент тармыл кушаиг ӕлӕн нӕ Любовь Николаевна Ко-

вешникова ӕс аквит лӕтын лӕвыс: «Мӕн ӕлӕн мӕв мӕгыс шар мӕк тынӕн мӕйлупса – ты нӕн вӕрнӕ тӕлан. Нӕврам ханищтам хӕтпа пенсиян минаме тӕпыл, ӕлӕнӕт палытыл ӕлӕль ӕс акв та щирыл учителиг та лӕваве. Тав кос хоты мӕт рупитаӕкве паты манос юн ӕцлахтуӕкве паты, тавӕныл туп ӕмас, сымын лӕтын хӕлӕв. Пус кӕт, пус лӕгыл ӕлӕн!».

Заслуженный работник намыл хус арыг хӕтпа майвес.

Хӕрум хӕтпа Тюменский область Дума-ныл янытлан нӕпакыл кӕтвёсыт – Е.П. Максимова (Нижневартонск ӕст ӕлы), Л.С. Карандаева (Ханты-Мансийск ӕст ӕлы), О.П. Пашковская (Сургут ӕст ӕлы) Тӕн ань пуссын яныгпӕла ӕкват, пенсиян хосат минасыт.

Мӕхум янытлан тӕла оигпае юи-пӕлт Центр искусств колт ханищтахтан нӕврамыт «Белоснежка и семь гномов» намба мӕйт суссылтасыт. Татем нӕтнӕг ййквсыт, оцхольласыт.

**Светлана  
МАТВЕЕВА**



## КҮЩАИТ РҮПАТАНЫЛ

## Лёккарыт сым аҕмыт урыл потыртасыт

**О**кругувт мир пусмалтан департамент кұщай Александр Филимонов, округ пұльница кұщай Алексей Добровольский ос Россия академия наукат сым аҕмыт пусмалтан яныг лёккар Ренат Акчурич ват сәграпнал этпост Ханты-Мансийск үс ляххал тотнэ колн ёхталасыт. Тән мир пусмалтан вәрмалы урыл потыртасыт. Нән ты урыл элалы ловиньтән.

Ты тәл сым аҕмыт пусмалтан тәлыг на-маим олы. Ты вәрмалы щирыл рұпата хумус мины, ань лёккарыт ты потыртасыт. Мир пусмалтан округ департамент кұщай Александр Филимонов сым аҕмыт пусмалтан «Югра-кор» на-па проект урыл потыртас. Тав 2008 тәлт нөх-вөрмалтавес. Ты вәрмалы таимәгыс щёпитавес, сым аҕмыт хосыт сәв махум хот-талы ул вос щалтёгыт ос аҕмың-мосыңыг ул вос ёмтёгыт. Тыт оlnэ

мирув сәвнүв тәл пустагыл элалы вос оlnэгыт.

Ты проект щирыл Югра мāt хұрум яныг пұльница үнттувес: ты Сургут үст оlnэ «Центр диагностики и сердечно-сосудистой хирургии», Ханты-Мансийск үст оlnэ округ яныг пұльница ос Нягань үст оlnэ яныг пұльница. Тот сым аҕм ошнэ махум этэ-хоталэ сыс пирмайтавет. Кәсың хөтпа ураль-тахтын магыс тув ялуңкве вәрми. Элы



мāt оlnэ махум пұльница минуңкве нётавет.

Пұльница пус-сын йильпи ищхипың утыл ёвтвёсыт. Тот лёккарыт ань тәрвитың операцият вәруңкве вөрмёгыт. Сым аҕмыт пусмалтан яныг лёккар Ренат Акчурич ләвнётэ щирыл, тыт рұпитан хирург-лёккарыт тәл сыс хұрумсәт-ниласәткем операция вәрёгыт. Тән ищхипың утыл рұпитаңкве ём-щакв хәсёгыт.

Округ пұльница кұщай А. Добровольский тох потыртас. Сым аҕмыт тәра-паттын магыс вә-тихал пұльница уральтахуңкве ялуңкв эри. Сымынт аҕм мошнүв сүйтнэ тёпыл, нәнән пусмалтан лёккарн тәра ләвөн. Аҕмын юв ул пуве-лын, атиңк люльну-вег ёмтуңкве паты. Нәнкинән үргәлэлын, пустагыл оlnэ.

**Николай МЕРОВ**

## Литература тәл та оигпас

**Т**ы кастыл Ханты-Мансийскат «Югра-Классик» яныг колт махум акван-атыглавёсыт. Губернатор вәңын хум Алексей Путин мүй хөтпатн ёмас ләтың ләвыс ос хұрум касылыт нөх-патум хөтпат мүйлупсал мисанэ.



Нижневартовский районт потрыт хас-нэ хум Сергей Луцкий «Пока светло» ос Сургут үст оlnэ хум Николай Сочихин «Ностальгия» хансум нәпакагән магыс янытлавесыг. Николай Сочихин ма-вой нөх-винэ мāt рұпитас ос лүимәвт олум вәрмалит урыл стихыт ловинь-тас. Ханты-Мансийск үст оlnэ эква Галина Захарова хұрмит кас-сылт нөх-патыс. Тав олулпсат олыглам тәлат «Мы – мужики крестьянские» нәпак щирыл щёпитасанэ.

Округ Дума кұщай



советникыг рұпитан хум Игорь Ширманов депутатытныл паща ләтың ловиньтас ос төва поэ-тыт, писателит янытлан нәпакыл мүйлуптасанэ.

Тувыл Ас-угорский махум «Солнце» на-па театр Еремей Айпин хансум нәпаке щирыл вәрим спектакльныл маңь охсатэ суссыл-тавес. Ос тувыл мүй махум сәвсыр эрыгсо-выт хұнтлысыт.

Нәпак ловиньтан колт рұпитан хөтпат

Литература тәл кастыл вәрим тәлат овылтыт мощ потыртасыт. Тәл сыс округ янытыл акв-сөтыра атсәт арыгкем акван-атхатнэ хөнт-хатыглапыт варыгла-вёсыт. Писателит ёт 65 сөтыра сәвит няврам ос 480 сөтыра сәвит яныг хөтпат вайхатуңкве ёх-таласыт.

Мөтыт 2016 тәл нявра-мыт маңь пораныл янытлан тәлыг округувт намаявес.

**Тамара МЕРОВА**



## КҮЩАИТ РҮПАТАНЫЛ

## Тәрвитың әгм өщнэ хөтпат нётавет

**О**круг Думат рүпитан депутат Наталья Западнава сапрәни вәрыглас. Депутат-хөтпат, лёккарыт ос сәвсыр күщайт тув вөвиньтәлсанэ. Тән тәрвитың әгм өщнэ мәхум урыл тот потыртасыт.

Өвләт мир пусмалтан департаментыт рүпитан хум Владислав Нигматулин латың лавыс: «Ань округув яны-тыл акв сөтыра арыг-кем элумхөлас сәвсыр тәрвитың әгм өнщәгыт. Ты әгмың мәхум нас үргалавет ос сака ул вос саваләгыт, уколыл түщтавет. Төва хөтпат

пүльницат өнщавет, төва хөтпат ос юн өләгыт, лёккар тән палтаныл юв ёхталәгыт.

Тән халанылт 60% сәвит элумхөлас пувласпи-әгм (рак) өнщәгыт. Ты хөтпат элаль пусмалтаңке воссыг ат вөрмавет. Тән пүльницат хультупта-вет, ос кәсәщәгыт ке,

юв тотавет. Ань кәсың районт ос яныг үст өлнэ пүльницат ты мәхум мәгсыл акв-кит янас палата вәрвес. Таи люль, кәсың тәлныл тамле тәрвитың әгм өщнэ элумхөлас сәвнувөг ёмтәгыт. Округувт өлнэ мир уральтахтынәныл мәгыс лёккарыт палт ялуңкв акваг лавиянүв. Сартыннув пүльницат мәхум ке ёхтәгыт, тонт тәрвитың әгманыл пусмалтаңке рөви.

Ань мән йильпи рүпата вәруңке өвил-

таслүв, ты әгмың хөтпат акв реестр-нәпакн хансыянүв. Округ яны-тыл рүпитан лёккарыт әгмың хөтпат нама-ныл тув хансыяныл. Тамле нәпак өнщым, мән әгмың хөтпат тәра тәрпил кәтыянүв манос яныг үст өлнэ пүльницатн тотыянүв.

Ты күщай юи-пәлт округ янытыл ёхта-лам лёккарыт тәнки рүпатаныл урыл ос по-тыртасыт.

Людмила ТЕТКИНА



## Товлыңхәпыл яласан мәхум мәгыс

Яныг хөнт минам пәсныл сәтлов тәл минас, ань ос округув онтырсәт нупыл ат тәлэ төвлыс. Ты ялпың хөталыг кастыл Ханты-Мансийск үст товлыңхәпыт ёл-иснэ кол пөхат йильпи памятник түщтын мәгыс мә щёпи-тавес. Вәт саграпнал этпост тув яныг ахвтас пинвес.

Няврамыт ёт рүпитан «Патриот» нампә кол күщай хум Виктор Крот тот тох лавыс: «Мән округувт ань хұрум сөтыра атсәт ля-патем товлыңхәпыл яласан ос товлыңхәпыт уральтан хөтпа рүпиты. Тән вәрнэ рүпатаныл сака тәрвитыңыг өлы. Тәлэ-туве, этә-хөталэ сыс сәңквыт-түйтыт товлыңхәпыт тыгле-тувле та яласәгыт. Тот рүпитан мәхум тәнти рүпатаныл ёмщаквег вәганыл, эрнэ щирыл вәрияныл. Мән тәнанылн яныг пұмашипа латың лавёв ос тыт тән мәгсыланыл памятник тах түщтәв.

Александр АНЯМОВ

## Ханты хум Еремей Айпин урыл кина пөслувес

Округув янытыл ты этпос 3-10 хөталанэ культура ос искусство кынылан хөталыг на-маим өлсыт. Ты ка-стыл сәвсыр мирыт өлупсаныл урыл ки-нат пөслын нә Нина Серебрякова ёт пресс-конференция вәрыглавес. Тав «Этнос» нампә кол тармыл күщайг өлы.

Нә йильпи кинатэ сосаң мир ёт рүпитан Ассамблея күщай хум Еремей Данило-вич Айпин урыл пөслыстэ, руш ләтңыл «Звезда Утренней Зари» Еремея Айпина. Ханты»намылпиныстэ.

Нина Серебрякова ты кинатэ урыл тох лавыс: «Еремей Данилович пөслумум порат ам амти өщнэ номтанум щар ат потыртәлсанум. Еремей Данилович өлупсатэ хумус өлы, та щирыл пуссын пөслувес. Тав ётэ рүпитаңкв сака пұмаш. Тав таквирот аквпи-сыг матаре урыл та номсәцлахты. Тавән матыр ат те мұсты,



тәра ләлът ләви. Кинав пөслымав по-рат Еремей Данило-вич матаре мәгсыл аквписыг мощ эссамтас. Пөслын мәныл астымав ос кинаг вәрмув юи-пәлт, тав ты кина тәра сунсыстэ. Мән акван-нётхатым пөслум вәрмалюв тавән мұстыс».

Аквта хөталт Еремей Айпин урыл пөслым кина Ханты-Ман-сийск ұсың мирн сус-сылтавес. Нина Се-ребрякова лавыс, ты кина торгамтаңкв эри. Тәймәгсыл кина сус-нэ порат төва мәнылат мәхум тувыл кон квәлсыт, матыр ул ат торгамтасыт.

Александр  
ВЬЮТКИН

# Няврамыт газетагүв сунсуңкве ёхталасыт



**«Ханты ясаң» ос «Лүймә сәрипос» газетагт рүпитан хөтпат Ханты-Мансийск үс №6 школат хөтүт классыт ханищтахтын няврамыт редакциян вөвиньтәлсаныл. Мән тәнаньыл газе-таг урыл потыртасүв. Пуссын аквёет ловманкем агит-пыгыт ёхталасыт.**

Ляххал тотнә мähмaнyв мähнь, яныг павлытн сoссaң мähмaнyв палт вәтихал ялантәгыт. Тот сав пүмаш хури пöсләгыт, сав пёс потыр хансәгыт. Төва хурит колнакувт норыт тармыл тагa-тым öләгыт. Ань ёхтa-лам няврамыт öвләт пöслын хуритыл такталавёсыт. Тувыл ищхипың ут хосыт суссыт, хумус газе-таг вәравёг.

Та юи-пәлт тән яныг колнакн вөввёсыт. Тот мähныщи хум Александр Вьюткин нётнә тәныт сәңквылтас. Тав сака мähщтырыг сәңквылты. Няврамыт тав ёнгум тәнанә татем та хүнтлысыт.

Тувыл күщай нё Раиса Решетникова газе-таг урыл потыртас. Няврамыт мähгыс ман-хурип газетат мән тәратёв, маньсыр ка-сылыт щёпитәлэв ос



маньр урыл потырт хансёв.

Няврамытн ты вәрмаль сака мұстыс. Тән мähныщи ос хан-ты хөтпат öлупсаныл урыл мoщ вәгыт,

«Төрүм маа» музейт ялпың хөталыт öлыглан порат тув акваг тоты-главет. Ос щәнә ләтңыл хаснә газе-тагүв нәм-хуньт ат вәщинь-тәлсаныл, сака пүмшa-лахтасыт.

Ты вәрмаль оигпан элы-пәлт ляххал тотнә хөтпанув няврамытн нәпакыт мүйлуптасыт. Ты мähныщи ос ханты ләтңыл хансым жур-налыг «Витсам» ос «Хатлые». Андрей Тарханов хансум «Бу-ранная Россия» нам-па йильпи нәпаке кәсың няврамн май-вес. Ос школанылт öлнә нәпак ловиньтан кол мähгыс нәпакыт мүйлуптавёсыт. Нявра-мыт щәгтым юв та ми-ныгласыт.





# Тит хөталн пұнсығлым суссылтап



**Т**ы этпост хурит катыл пөслын ойка Геннадий Степанович Райшев колт суссылтап вәрыглавес, руш ләтңыл «Живая традиция» намтым җыс. Тав тит хөтал рупитас. Мәштырлан мәхум катыл вәрум савсыр пормасаныл тот суссылтавәсыт.

Овыл хөталт «Сөрни ёш» (Сөрни кәт) нампа колт рупитан мәһлат ханты нә Надежда Молданова тув атхатыглам мәхум янытласанә, тав тананылн лавыс: «Мәһ анә вәрим суссылтапувт нила районныл җлнә вәт мәштыр хөтпат пормасаныл тыт суссылтавет. Тән халанылт нәлолов хөтпа «Народный мастер России» яныг нам җнәшәгыт. Төват сәлы үрим вөрт җләгыт. Хорамың пормасаныл тәнти катыл мәштырланәһыл мәгсыл

ам тәнанылн янытлан ләтың ләвәгум».

Тув җхталам мәштыр мәхум халт мәһ мәһици хөтпав Мария Сергеевна Меровә җыс.

Мәһлат нә юи-пәлт Татьяна Степановна Гоголева янытлан ләтың лавыс: «Тыхөтал мәтәмас мәһ тамле җмас колт акванатхатсүв. Тыг җхталаңкв сака җмас. Тамле мәштыр хөтпат халт җмыгтамум, сымум щәгтым җыс. Ты суссылтапн пиным пормасыт кұшаяһыл ам

пussyн вәганум, тән җмас сымың ос нәмса хөтпаг җләгыт». Тувыл тав ты суссылтап щәпитам мәхмыт pussyн хорамың лүптәл мүйлүптасанә.

Г.С. Райшев рупитан колт кұшәиғ Наталья Николаевна Фёдорова җыс, тав анә лавыс: «Ам яныг пұмәшипа ләтың тыг җхтум хөтпатн ләвәгум. Тән pussyн тәнти щираһылт яныг мәштырыг җләгыт. Геннадий Степанович йильпи пөслум хуриянә ос мәштыр мәхум вәрум пормасаныл pussyн акванпинсанүв, тән татем аквәт җмәшакв сусхатәгыт. Анә ты суссылтапув наме - «Живая традиция»,

ам номсәгум, мәк ты нам тыг ты рөви. Мәһавн ты мәт җлнә соссаң мәхум урыл нәмхотты порат җрувләңкв ат әри. Ханты ос мәһици мирыг җлупса нәмхотыютн җмәшакв торгамтаңкв ос хаништаңкв ат вәрмаве. Соссаң мир пәс йис җлупса хаништан уҗәһый мәхум вәгыт, мәһыр урыл ам ләвәгум. Нән әрнә щирәһыл вәрнә пормасаныл сака нәтнәг сусхатәгыт. Мөт мир хөтпа вәрум пормасә ам тыт тәра кәсалылум. Матыр щирәһыл, нән пормасаныл мөт хурипаг сусхатәгыт. Анә мәһ тамле пұмыщ ты суссылтап вәруңкв номылмәтсүв. Мәһлат мәхум вос сунсәгыт, вос хаништахтәгыт. Хотты порат, әрың, мәһ тән вәрум рупатаныл нупыл җс сунсуңкв патәв».

Сөль, тамле суссылтапыт үсың мәт җлнә хөтпатн сака әрәгыт. Туп тит хөталн пунсыглавес, тыи сака мощща. Нән җс мәштырлән, пүстәгыл җлән.

**Александр  
ВЬЮТКИН**





## КҮЩАИТ РҮПАТАНЫЛ

## Эрнэ ос ёмас тэла элаль тотаве



**В**ят сәграпнал этпос 9-12 хоталытт  
Вокругу янытыл савсыр павлытныл,  
ўсытныл махум пормасыт ос тэнутыт ты-  
налан магсыл Ханты-Мансийск ўсн ёхта-  
ласыт. Ты тыналахтын тэла руц латһыл  
«Товары земли Югорской» лававе.

Ты тал тав ху-  
сыт щёс вәрыглавес,  
махум танти вәрум ос  
щёпита тэнутаныл,  
танти катыл мащтыр-  
лам пормасаныл тот  
тыналасаныл. Титсат  
савсыр нампа орга-  
низация тыг ёхталас.  
Товат танти халанылт  
акван-нётхатым сав  
тал аквёт рупитэгыт.

Округ яныг кўщажов  
Наталья Комарова  
касың ёмт тыналахтын

махум палт яланты.  
Ярмаркат сунсыглах-  
таме порат махум ёт  
потырты, мощ ти-  
тыглыянэ, тан ху-  
мус рупитэгыт. Ёхтум  
махум тавен савсыр  
пумащ, атың мўйлупсат  
мўйлуптэгыт. Ты  
порат Наталья Влади-  
мировна яңк сәтапныл  
сагим, хорадың пәссал  
мўйлуптавес.

Ты ярмарка хўрум  
хотал рупитас.

Тыналан тэнутаныл,  
пормасаныл нётнэг,  
пўмшиг щёпитым  
олсыт. Ты порат  
поям сәлы нёвыль  
атим олыс. Махум  
сәлың нёвыль урыл  
аквписыг титыглах-  
тасыт. Савсыр щирыл  
щёпитым мот уйхул  
нёвыль сав тыналавес.

Мән мәнщи ху-  
миев Иван Качанов,  
«Турупья» община тар-  
мыл кўщаж олнэ хум,  
ёт тотыглам воруи  
сөванэ овыл хоталт  
тара ёвтивёсыт. Нёхыс,  
вонтыр, норка, лэпык  
ос охсар совыт-  
ныл юнтым тентыт,  
савсыр хансаң лагыл  
маснут ос янгүй ко-

тыл юнтым пуркат  
тот ос тыналавёсыт.  
Сав пурка Хальўс рай-  
он Саранпавылыл ос  
Белоярский район  
Касум павылныл тыг  
тотыглавес. Та хўрум  
хотал сис «Югра-  
Экспо» колн нёлолов-  
хуйлов сотыра ляпа-  
тем хотпа ёвтахуңкв  
ёхталас. Ярмарка лап-  
пантым юи-палт махум  
тув иң минасыт.

Ёхталан мир магыс  
концерт вәрыглавес,  
сценаныл махум  
эргысыт ос йиквсыт.  
Хўрмит хоталт хотал  
палыт савсыр пумащ  
ёнгилыт вәрыглавёсыт.  
Няврамың махум  
нявраманыл ёнгын  
мат хультуптаңкв  
вёрмысаныл. Щаня-  
ныл-ащаныл тэнут  
ёвтиёныл сис тан  
уральтым ошвёсыт.

Ты сака ёмас рў-  
пата, элы мат олнэ  
соссаң махманув  
тыг ёхталанёныл  
сис матыр тына-  
лаңкв вёрмёгыт,  
сакати, танти магсы-  
ланыл олн мощ  
сэлэгыт.



**Александр  
ВЬЮТКИН**



СОССАҢ МИР ӨЛҮПСА

# Соссаң мир ялпың хоталт мүйлысыт



**Советский районт ос Югорск ўст  
85 талэ төвлын кастыл Советский ўст  
акван-атхатыгласыт.**

«Югра лылыёп» наппа организацият рүпитан хотпат тан соссаң махум тув вöвиньталсаныл, күщаиг тот Виктор Вискунов олы. Öвлэт тав махум ялпың хоталыл янытласанэ. Тав лавыс, тан ань этнотуризм щирыл элаль рүпитаңкве патёгыт. Миркол күщаит тананылн ос тах нётёгыт. Советский ўс пöхат маныщи павыл ўнттёгыт ос мүй хотпат ўщлахтуңкве тув вöвиньталыглаңкве патяяныл.

Советский ўст öлнэ Светлана Кузьмина тув ёхталам махум ялпың хоталыл ос янытласанэ. Тав касың хотпа «Югра лылыёп» организация палныл мүйлупсал мүйлуптастэ. Югорск ўсныл ёхталам маныщи эква Нина Георгиевна Рукова такви хансум стиханэ. Мүй махум нявраманыл ос апыгрищаныл ёт тув ёхталасыт. Агирищит-пыгрищит округув янытлан кастыл стихыт



ханищтасыт. Ульяна ос Гриша Беловыг стихыт тот ос ловиньтасыг.

Нина Лапсуй, Советский район Таёжный павылныл öлнэ нэ, мүй махум магсыл ханищтап вэрыглас, тав тананыл салы сов тынтлуңкве ханищтасанэ. Ты юи-палт мүй махум пуссын аквьёт нярхул тэсыт, щай айсыт ос потрамасыт.

«Югра лылыёп» от-

деленият күщай хум Виктор Вискунов Советский районт öлнэ соссаң махумн тамле ляххал лавыс, тан Советский ўст Хвойный ўсхулыт öлнэ колт кит колнакыл майвёсыт. Ань районт öлнэ соссаң махум ватихал тув вöвиньталыглаңкве патяяныл.

**Дарья  
БЕЛОВА**



# Тәнаньылн мәнь тәгыл ты урыл вәңкв эри



**М**ән мәньщи ос ханты газетагүвт рүпитан мәхум ват сәграпнал этпос нилыт хөталт Ханты-Мансийск үст өлнэ «Солнышко» нампса садикн вөвыглавесүв.



Мән хұрум хөтпа - ам, Ирина Самсонова ос Людмила Спирикова тув ялсүв. Нэг сас ханты ләтңыл хаснэ «Ханты ясаң» нэпакт корреспондентыг рүпитэг. Мән тот нйврамытн манти өлупсав урыл, ханты ос мәньщи маснутаңув, хораманув ос сәңквълтан утанув урыл потыртасүв. Та хөтал округувт янытлан хөтал кастыл вәрыглавес.

Ат группа тув ёхталас, хөтпан арыгтем сәвсыр яныт нйврамыт акв юипәлт вәнтатәлым тув тотвёсыт. Яныг колнакн щалтум нйврамыт акв ляпан үнтүңкв кос тахсыт. Воспитателяныл тән ётаньл ворил вёритым ләкквә тәнти ляпаньлт үнттысаныл.

Мән ётув өлум хөнтхатыглап округ пёс пора урыл потрыл өвылтавес. Төнт Ханты-Мансийск үс Остяко-Вогульск үсыг намаим иң олыс, хумус та порат мәхум тыт өлсыт, маньр рүпата вәрысyt. Тувыл нйврамыт титыглавёсыт - хотьютаныл



соссаң мир халт рүт манос юрт мәхум оныщи ман ати. Нйврамыт халт ловмантем нйврам туп мәньщи ос ханты рүт хөтпа оныщёгыт.

Тувыл мән, газетагүвт рүпитан мәхум, мощ манти рүпатав урыл потыртасүв. «Ханты ясаң» нэпакт рүпитан нэг ханты мир маснутаныл урыл мощ потыртасыг. Ам ос потыртамум юипәлт пүмаш мәгсыл «Куринька» ос «Сәт тўрхул тәнэ тән» мәньщи тәныг сәңквълтасагум.

**Александр  
ВЬЮТКИН**



СОССАҢ МИР ӨЛҮПСА

## Ща́нь лāтңыл потрыт вос хансэв



Максим Амелин

Вāt сaҗрапнал этпос 8 хōталēt Ханты-Мансийск үст олнэ соссaҗ мир мāk яныг библиотекат акван-атыглавэсыт. Потыр «Антология современной поэзии народов России» ос «Программы поддержки национальных литератур народов Российской Федерации на

период 2016-2017 годы» нампа проект вāрмалъ урыл олыс.

Москва үсныл кит нэг-хумыг ёхталасыг, Максим Амелин ос Александра Стрелова. Ты яныг үст мāхум Антология нампа нэпак-капай щёпитэгыт. Тән лāвмән ширыл, руц мир коныпал Россият олнэ мōт мирыт тāнти лāтңанылт стихыт ос потрыт вос хансэгыт. Кāсың мирныл лов хōтпа вос хансы, тāн потраныл ман стиханыл пуссын ёмашакв ловиньтавет. Тувыл мāk ёмас потрыт ман стихыт пёриявет, руц лāтңыг толмашлавет, нэпакын хансавет. Тув руц лāтңыл нэматыр ат виве, туп щāнь лāтңыл хансуңкве эри.

Ятил мāныщи мāхум, эрың хотьютын кāсаци матыр хансуңкве, ты нэг-хумыг палт потранын ман стиханыл кётән. Тән телефонән: **8 (495) 626 24 75**. Тув звонитән, китыглахтан лāтың оныщегын те, китыглахтән, акван-потыртахтән.

Светлана МАТВЕЕВА

## Йис мāt рупитан соссaҗ мāхум арыг олныл мивет

Мāн округувт «Социально-экономическое развитие КМНС ХМАО - Югры на 2014-2020 годы» нампа программан нётмил вāрнэ лāтың хасвес. Ты урыл округ губернатор нэ Наталья Комарова кўцаит акван-атыгламе порат лāвыс.

Тав лāвыс, йис мāt хўл алышлым ос вōраим олнэ хōтпатн 3 миллион 500 сōтыра солкōви сāvсыр тэланыл мāгыс мивет. Мā-вит ўргалан департамент кўщай хум Евгений Платонов ты урыл лāвыс, ты олныт 28 соссaҗ хōтпат халт лāкквaуртавет, тāн хосат тāгыл нётмил ўрэгыт.

Ты сōпас олныт Кондинский, Хāльүс, Октябрьский, Белоярский районьт олнэ 25 хōтпан йис мāt олнэ колыт ўнттын мāгыс ойтaвет. Тувыл хўрум элумхōлас Ханты-Мансийский ос Белоярский районьт рупатаныл уцты овылтанэныл мāгыс нётaвет. Кāсың хōтпа 100 сōтыра солкōвил миве.

Округ кўщай  
пресс-службатэ кётум  
лāххал мāныщи лāтңыг  
Н. МЕРОВ хансытэ

## Татьяна Ильинична намхōталэтыл янытлылүв

Ты этпос 30 хōталēt Татьяна Ильинична Коровкина, āги опарищ наме Ромбандеева, намхōталэ ёмты. Тав ань 60 тālэ тōвлы. Ты мāныщи нэ кит яныг пыг оныщи. Овыл ойкатэнтыл пыге Николай Васильевич Ромбандеев ань Коғалым үст олы. Тот мāвōй винэ мāt рупиты. Янас щёмьял олы, кит нāврам оныщи.

Татьяна Ильинична ань олнэ ойкатэ наме Пётр Петрович Коровкин, тән сāv тāl аквёт олэг. Пыгән наме ос Пётр Петрович Коровкин, тавань Ханты-Мансийск үс №8 школaтт нāврамыт ханищтым



рупиты. Пётр акв нāврам оныщи.

Ты мāныщи нэ школа āстламе юи-пāлт Ханты-Мансийск үст мāнь лēккарыг элалъ ханищтахтас. Тав өвлэт

Сўкыръя пўльницат рупитас. Тувыл ётылнув ос Саранпавыл пўльницан патхатас, тот сāv тāl рупитас. Ань пенсият олы. Пыгыг омаатән намхōталыл

янытластән, тән тамле лāтың кётсыг:

«Ятил, тының омакве, мән наңын намхōталыл сымыңыщ янытлылмән. Мән наңын сака эруптылмән. Ос сāv тāl пустагыл элалъ олән. Нāй-Отыранын вос ўргалавән».

Мāн, редакцият рупитан мāхум, Татьяна Ильинична ёмшакв вāглүв, таве намхōталэтыл ос янытлылүв. Олупсатэ мўсхал ширыл вос мины. Элалъ олнэ хōталанэ посыңыг вос олэгыт. Рўтанэ ос апганэ эт щāгтым элалъ вос олы.

Пыгаге лāвум лāтың  
мāныщи лāтңыг  
Н. МЕРОВ хансытэ

# Тав ома тэ Сакв я ёрныл ӧлыс

**Х**альӱс район Восынтӱр павылт сав  
Няврамын колтагыл ӧлы. Николай  
Степанович Анимов ос экватэ Ирина Лео-  
нидовна мӱнӱщи хӧтпаг, ат няврам ӧныщӧг.  
Ам тӱн коланылн щалтсасум, тӧн ӧтӧн мош  
ӱнлахӧлсум, потрамасум. Нӱн ань ӧлалъ  
Николай Степанович потре ловиньтӧлӱн.

– Ам Восынтӱрт са-  
мын патсум, лӱпта  
ӧтпос 28 хӧталӧт 1968  
тӱлт. Омам та порат  
Новинские павыл сов-  
хозт рӱпитас, ам тот  
яныгмасум. Омам наме  
Мария Петровна, ӱги  
ӧпарищ наме Сайна-  
хова. Тав Хӧрыпавыл  
манос Лӧпмус павыл  
ёрныл ӧлыс. Ам хунь  
иӱ мӱниг ӧлсум, во-  
рил ты номилум, омам  
ӧт тав самын патум  
мӱтӧн ялсум. Рӱтанув  
ань тот хӧт ӧлӧгыт,  
тув ат ялантӱлӧв,  
нӧмхотыют ӧт ат  
вайхатӧв.

Омам потыртӱлыс,  
тӧн увщитӧнтыл  
манос ӧщӧнтыл яныг  
каӱкӧн тыгле тотвесыг.  
Тӱн оманыл ос ӱтаныл  
хотталь щалтсыг,  
тӱнттӧныл ӧлсыт.  
Ты вӱрмаль яныг  
хӧнт порат ӧлыс.  
Ань ам потрум хот-  
ты рӱт хӧтпанувн ло-  
виньтаве те, ӱнумн  
пишма вос хансӧ-  
гыт. Ӑрыӱ хотты  
нас пӧх хӧтпа  
омам вӱстӧ, аквӧт

яныгмасыт ман ха-  
ништахтасыт, ӱнумн  
акв-кит лӱтыӱ вос  
хасумтанув. Омав  
урыл сака ти мӱнъ  
потыр тӱра вос  
паттынувӱв.

Щ ӱ н ь - ӱ щ а г у в  
Восынтӱрт акван-  
минасыг. Колтаглувт  
мӱн ат няврам самын  
патсӱв –хӱрум каӱк,  
кит ягӱги. Мӱн  
нила тыт ӧлӧв –  
яныг каӱкум Алек-  
сандр, тав ӧлы-  
пал каӱкум Сергей,  
Таня увщим ос ам.  
Щар яныг увщиюв  
Зоя щӧмьяӱ тӱгыл  
Украина т ӧлы. Тыт  
поварыг хаништах-  
тас, тӧнут пӱйтым  
нӱнхӱпыт ос няврам  
сидикт рӱпитас.  
Ӑйкатӧ ӧт тыт акван-  
хӧнтхатасыг, 1980  
тӱлыт порат Укра-  
ина мӱн вӱнтлысыг.  
Тот ань хӧнтлын мӱт  
пыгӧн порслувес. Ты  
урыл увщим лӱтыӱ  
кӧтсас. Ань аман  
хумус ӧлӧгыт, тавагт  
хосат ат потыртасӱв.

Пӧс йис мӱнӱщи  
пӱвланувт нӧмхотыют  
ат ӧлы, пуссын яныг  
пӱвлытн ӧлмыгтасӱв,  
ты мӱгсыл сымум  
сака щӱрги. Туи  
яныгмам пӱвлумн, Но-  
винскийн, ялсум. Пу-  
мын лап-яныгмиа,  
лылыӧпе сыстам,  
татем нӧтнӧ мӱкве.  
Пӱгле ӧмсум, лӱгыл  
маснутагум хот-  
ӱхвсагум, нӱр лӱглыл  
мош ӧмыгтасум. Ятил  
мӱтенув, пӱвылтенув  
пумын-нирын лап



Николай ос Ирина мӱнӱпыгӧн ӧт пӧслым ӧлӧг

та яныгмавет. Мӱн  
ань ӱхвтасыӱ лӧнх  
тармыл та ӧмӧв,  
машина мины, сӧй  
нӧх-лапи, тыил та  
лылтӧв.

Ань мӱнӱлат мӱхум  
пуссын яныг ӱст  
ӧлуӱкве таӱхӧгыт,  
щӧмьяӱ тӱгыл тув  
вӱнтлӧгыт. Мӱнти  
пӱвланувт ӧлсӱв те,  
нявраманув сыстам  
лылыӧпыл лылым  
яныгманувыт, мӱнти  
хӱлтенув, пиланув  
тӱим ӧлнувыт.

Ӑквӱм ӧт мӧн  
тыт акван-хӧнтха-  
тасмӧн, ат няврам  
ӧнӱщимӧн. Тӧвана-  
мӧн яныгт, нявра-  
мынӱг ӧмтсыт.  
Тӧлы ам кочегаркат  
кӱр пӱлтыглым  
рӱпитӧгум, туи  
отпускат ӧлӧгум.  
Хӱл алыщлӧгум, хӱлтӱл  
ат ӧлӧв, нӱрхул тӧгӱв.  
Ань тӧванакт мӱхум  
лавыллӧгыт: хӱл ӱтим,  
тав хумус ӱтим,  
алыщлаӱкв минӧгын,  
тӧнӧ савит пувӧгын.

Николай Степа-  
нович экватэ Ирина  
Леонидовна 1976 тӱлт  
самын патыс, тав ӧс  
мош потрамас.

– Омам наме Ва-  
лентина Ефимовна  
Лихачӧва, руш нӧ, тыт

самын патыс, ӱги  
ӧпарищ наме Непом-  
нящих. ӱтӱм мӱнӱщи  
хум ӧлыс, Леонид  
Андреевич Лихачӧв.  
Тав Неремово пӱвылт  
самын патыс, Но-  
винскийт яныгмас,  
хумыг-ӱиг ӧмтме по-  
рат Восынтӱр пӱвылн  
ӧлмыгтас. Омам ӧт  
тыт акван-хӧнтхатасыг.  
Тав ӧлтӧт мӱнӱщи  
лӱтӱыл потыртас.  
Мӧлты тӱл ӱтимыг  
ӧмтыс.

Мӱн хӧт няврам  
самын патсӱв. Толя  
каӱкув хотталь  
щалтыс, тав щар  
яныг ӧлыс. Мӱн ань  
тыт нила ӧлӧв, мӱнъ  
ӧшув Шайтанкан  
вӱнтлыс, Оксана Ли-  
хачӧва. Пуссын тыт  
яныгмасӱв, школа  
ӱстласӱв. Ам совхозт  
мис посым рӱпитасум.

Школат мӱн мӱнӱщи  
лӱтыӱ хаништасум,  
Гындыбина Елена  
Николаевнан ханишта-  
весӱв. Тав уроканӧн  
щӱгтым ялантасӱв,  
мӱнав сака ӧма-  
шакв хаништастӧ. Нӧ  
холоме юи-пӱлт  
лӱтнув та пӧилттавес.  
Нӱврамыт ань  
Роза Семёновнан  
хаништавет. Уро-  
кын ялантаӱкве сака



Ирина анекватэ



ат таңхёгыт. Щань латһаныл ат вәганыл, ат иң хұлыгыяныл, улпыл таимәгыс уроканылн кәсмостал та ялантёгыт.

Ойкамёнтыл ат нйврам оныщимён. Яныг пыгмён Андрей, тувыл Тая, Толя, Света. Питипатта пыгмён Алеша, китыт тәлә төвлыс.

Ты ятил мәньщи нэг-хумыгн ам сав ёмас, сымын латын лавёгум. Нйвраманён ёт пустагыл вос олэг, Нй-Отыранылн вос ўргалавет!

Сакв я ватат олнэ мәньщиянув, эрың хотьют вастэ Николай Степанович ома-тэ – Мария Петровна Сайнахова. Тав урёт матыр хұлыгласын те, газетавн манос Восыңтұр павылн пища вос хасумтануын, латың вос кетнуын.

Мәнь таквс ётпос № 19 газетат ос Александр Прокопьевич Сайнахов урыл хансыгласум, ос Восыңтұр павылт олы. Тав аятятэ хоты мәныл олыс, ос торың ат вәгтэ – наме Прокопий Антонович Сайнахов, 1933 тәлт самын патыс. Александр лавме щирыл, аман Кульпас ёрныл олыс, аман Лопмус павылныл, ат вәгтэ. Мән ань «Жди меня» руц программа хольт ты хансэв, тот махум татем хонтыгпавет. Мән ос акван-юрщхатэв, халанувт нётхатэв, китгагув нётыягүв. Я тил мәньщи махуматёнув, таяныт ёмас вәрён, матыр тәра-паттёгын те, газетавн пища хансён. Пуссын пустагыл олән, Төрүм ёт, Отыр ёт олән!

**Светлана  
РОМБАНДЕЕВА**

#### СОССАҢ МИР КУЛЬТУРА

## Сәлыт сәвмалтан вәрмалъ

**Ю**вле хульгум ётпост ам Сургутский районныл ёхталам ханты нэ ёт вайхатыгласум. Тав наме Людмила Айваседа. Молты Людмила Сергеевна уйхул янмалтан ос туристыг яласан махум ёт рупитаңкв вуйхатас, руц латһыл те лавуңкве – «Крестьянско-фермерское хозяйство» вәрыс.

Олнэ матёныл Когалым ўс мус хотпан вёрыста. Тән нила хотпа акван-нётхатым рупитёгыт. Людмила Сергеевна ўсың мат нэпаканэ щёпитасанэ ос рупитан магсыл эрнэ хотпат ёт потыртахтас. Рүтанэ сәлыт ўрим аквписыг вёрың мат олэгыт. Аняг ошнэ сәлыяныл хотпан ляпатем савитын

ёхтёгыт. Ты коныпал мощ мола́лнув иң атхуйплов сәлы Бело́ярский район Нумто павылныл ёвтсыт.

Нэ хосат тагыл ты урыл номсахтас. Молты Когалым ўст Людмила Сергеевна общинатэ хұрумсәт сөтыра савит олн-нётми́лыл майлу-вес. Вәрмаля́нэ тәра



мощ элалъ нёвумтасыт. Та олн-нётми́лыл вёрт колыт ўнттуңкв ос сәлың пусасыт йильпи́иг щёпитаңкв эрегыт. Пуссын номылматым щирыл те а́ртми, нэ такви палтылэ муйлы́н тури́ст ма́хум пирма́йтаңкв патыянэ. Муй ма́хум вора́яңкв, хул алы́щаңкв ос нас ў́шлахта́ңкв ёхтала́ңкв патёгыт.

Мо́ла́лнув та́нти ёраны́л хосыт титяны́г олнэ кол ос акв сұмъя́х ўнтты́сыт. Йильпи́ тәл о́вылта́хтын порат ў́шлахтын хо́талыт сыс Ко́галым ў́ст олнэ мир сәлы́ң сұны́л тоты́глан ма́гыс тув ёхтала́ңкв воввёсыт. Тән палта́ныл сав муй ма́хум ёхтала́ңкв та́х патёгыт.

Ань Лю́дмила а́тятэ Серге́й Айвасе́да ёрнкол ма́гсыл авлат турасты. Ёрнкол щёпи́тан ма́ныл а́стынэ́тэ юи-па́лт та́н ляпа ў́ст сәлы́ң сұны́л ма́хум то́тыгла́ңкв паты́яныл. Нэ ла́выс: «Ущты о́вылта́м рупа́там эла́ль шар ат лакви. Нас мощ ве́ритаңкв эри, ошнэ номта́нум тә́лаг вәру́ңкв те, тувыл уц маты́р та а́ртми».

**Александр  
ВЬЮТКИН**



И. Самсонова в әрүм-хури

# СЫМЫҢ ЭЛУМХӨЛАСЫГ ӨЛЭН

**«Мәхумақвет, нәнки халынт нәтхатым ос акван-юршхатым акваг өлән. Нәвраманын әруптым янмалтән. Ёмас сымың хөтпа сәв олы, туп төват ул вос айнувыт,» - там-ле латың Зинаида Фёдоровна Истомина округт өлнә мәхумн лавыс.**

Зинаида Фёдоровна ань агитә палт Ягрим павылт олы. Тав 1928 тәлт Саранпавылт самын патыс, ань 87 тәлэ төвлыс. Эква такви өлупсатә урыл мәнавн тох потыртас.

– Ам саран мәхум колтаглыт яныгмасум. Щәмьявт сәт нәврам олыс: нила аги, хұрум пыг. Хұрумхуйлов тәлум төвлыс, яныг хөнтлан вәрмалә өвылтахтас. Атяв Фёдор Николаевич хөнтлуңкве тотвес, тот хөт порславес. Ты элы-пәлт тав Сортыня колхоз кұщаиг паттувес ос мән тув вәнтлысүв.

Войнат атяв командирыг лусытас. Василий қаңкув ос войнан тотыглавес ос агмың-мосыңыг юв ёхтыс. Қаңкум потыртәлыс, тән акв щәс я ултга унсысыт. Төнт сәвсыр мәныл салтәтыт тув тотвёсыт, ос элалә хөнтлуңкве кәтыглавёсыт. Тот ты қаңкум ащув ёт хөнтхатыглас. Тән туп пащалахтуңкве алымасыг ос элалә хөнтлуңкве та тотвёсыг.

Омав Ульяна Степановна хоса ат олыс, атимыг ёмтыс. Мән Мария яныг увщи-ювн янмалтавёсүв. Тав мөлалнүв 90 тәлэт атимыг ёмтыс. Ань Ягрим пұльницат рұпитан нә Елена Бондарчук рұпиты, тав щәне мәнавн акваг нётыс. Сәлитавёсүв, матыр тәнүтыл тотыглавёсүв.

Мән, нәврамыт, юн

хультум матумпәла хөтпатн этә-хөталә сыс нётсүв. Тән ёта-ныл вораёсүв, хұл алыщласүв, пум вәрсүв. Сыманув этгалан порат, пөлюйри-шит пувиянүв ос исмитыг пайтыянүв. Олупсав сака тәрвитың олыс, сәв саваласүв ос воссыг хоталә вәрхатәв. Таи ёмас олыс - сәв сымың мәхум халт өлсүв.

Ам сәт класс Тагт павылт астамам юи-пәлт Ханты-Ман-

сийский педагогический училищан элалә хаништахтуңкве мина-сум. Тувыл тот агмы-ңыг ёмтсум, таимагыс хаништахтын мәныл ёл-пойтсум ос юв та минасум. Юн сәвсыр рұпатан патхатыгла-сум. Матахмат тәл нәврамыт ўргалан колт рұпитасум. Нәвра-мақвет мәгыс кас вәрмув порат, эрыгсо-выт пианинал ёнгыса-нум. Ам амки баяныл, гитарал ёнгүңкве ха-ништахтасум.

Ёсал хайтыгтаңкве анумен ос мұстыс. Павылт ялпың хөталыт өлум порат касылыт вәрыглавёсыт. Ам тот акваг ёсал хайтсум ос нөх-патыгласум. Юи-



өвыл щәс 72 тәлумт ёсал ёмыгтасум. Төнт ёл-патсум, ләглум хотум ёмтыс, ань тыг мус агмың.

Ойкаментыл пенсиян патхатамүмән юи-пәлт Ягримн вәнтлысмән. Тыт яныг агимән олыс. Тав инженер хөтпаг хаништахтас, тыт рұпитас. Павылт депутатыг пәриылвес. Ойкам, ты агим ос акв пыгум ань пуссын атимыт. Тыт ань китыт агим ёт өлэгум, тав 60 тәлэ төвлыс.

Ам ань маныр, юн ўнлантәгум, ўшлахтәгум. Пенсия олы выгум, округ ялпың хөтал ос Победа хөтал кастыл оланув мощ нөх-нәтумталавет. Ялпың хөталыт кастыл мүйлупсал майлавёв.

Мөлтү Белоярский районныл мүй хөтпаг ёхталасыг ос анумен Победа хөтал кастыл янытластән. Ам садикт рұпитамум порат тән тув яланта-сыг. Төнт төва нәврамақвет щар этипәла мус садикт ос-сувлавет, щәняныл-ащаныл аим ат астагыт. Ам нәврамыт амки палтум юв тотыгласанум. Ань таимагыс ты лавёгум, нәвраманын ул саватән, эрумтым оныщән. Тән латың хұнтлан хөтпаг вос яныгмёгыт.

Зинаида Фёдоровна пұмыщ потре мәгыс мән пұмашипа лавёв, пус кәт, пус ләгыл тавән, Төрүм ёт, Отыр ёт!



Ирина Самсонова в әрүм хури



СОССАҢ МИР ӨЛУПСА

# Мәхум ёт тав ёмас номтыл ۆлыс

**М**осква ўст Третьяковский галереяҗ кәтыл пөслым сәвсыр пёс хурит суссылтавет. «Озорница» нампа хури кәсалаңкве тот ос рөви. Ты хури Владимир Игошев Хальүс район Няхщамвөль пәвылт 1956 тәлт пөслыстә.

Та порат тав пәвлың мәхманув палт ялантас, мәньщи ос саран мәхум хурин пөслысанә. Ань мәхум ләвёгыт, Владимир Игошев кәтыл пөслум хури-янә халт «Озорница» - ты шар мак ёмас ос мирн вәнә хури. Тот мәньщи аҗирищакве Прасковья Аментьева пөслым ۆлы. Тав нётнә, сөмыл ос яныг самагөнтыл тот такем пұмщалахтым сунсы, шар аквтуп хотють тав нуплә ке аңкваты, аҗирищ хот-эссамтаве, аңкрип сайн хот-түйтхаты. Төнт Владимир Игошев аквторыг кит картина пөслум, төванакт аҗирищ нупыл нас аңкватәлыс.

Прасковья Ивановна Няхщамвөль пәвылт самын патыс. Школа асламе юи-пәлт Ханты-Мансийск ўст хаништахтас. Тувыл Хулюмсүнт пәвылн рұпитаңкве кётвес. Нянь вәрнә нэг 15 тәл рұпитас. Ос пенсиян патхатаме мус Сосьвинской ЛПУ мәт рұпитас.

Ойкатөнтыл хөт няхврам янмалтасыг. Пыгагөн Данил, Алексей ос Иван



Хулюмсүнт пәвылт ۆлэгыт, Эля аҗитән колтәглә ёт Югорск ўст ۆлы. Ос яныг аҗитән Светлана Кондинский район Леуши пәвылт щөмыяң тагыл ۆлы.

Молты тәл вәт сәграпнал этпос 18 щислат Прасковья Ивановна атимыг ёмтыс. Ты тәл яңк нәтнә этпос онтоловит хөталәт 65 тәлэ төвлынүв. Тав ёмас сымың хөтпаң ۆлыс, пәвлың мирн сака янытлавес. Мәштыр нә ۆлыс, мәньщи супыт, пұркат юнтыс, сакныл хартуңкве хәсыс. Няхвраманә пуссын мәньщи ләтңыл потыртаңкве хаништасанә.

Та хуритныл Прасковья Ивановна яныг самыл мир нупыл сунсы, ты щирыл мирн яныг щәгт тоты.

**Лариса  
ТУГАНОВА**



Прасковья Ивановна Пуксикова урыл потыр **Светлана Динисламова** 2000 тәлт яныг таквс этпост №44-45 «Лүимә сәрипос» газетат хансыс: «Ам мәнь порамт аквнакт нәпакт пөслым хури кәсаласлум. Тот мәньщи аҗирищ пөслым ۆлыс. Төнт ты хури кәсың хөтпаң суссылтаслум, рущ юрт аҗиришит элы-пәлт эссыгхатасум: «Сунсән, мәньщи аҗирищ пөслым ۆлы!». Та пәсныл сәв тәл ювле хультыс. Ам Хулюмсүнт пәвылт ۆлмыгтамум юи-пәлт та пөслым аҗирищакве ёт хөнтхатыгласум. Тав наме Прасковья Аментьева. Хум вәрыс, ань Пуксиковаг ёмтыс. Тав Няхщамвөль пәвылт самын патыс. Щәнягә-ащәге ат аҗи янмалтасыг: Прасковья, Нина, Анна, Дарья, Варвара».

Ты хури урыл Прасковья Ивановна тох потыртәлыс: «Рущ хум аңум хунь пөслыстә, аты вәслум, төнт ам иң мәнь няхврам. Ам

пөслымам порат, ам нупыл төванакт туп аңкватәлас. Тав, наса-ти, тәра кит картина пөслум».

1999 тәлт №7-8 мәньщи газетавт Владимир Игошев урыл **Тамара Мерова** ос хансыглам. Ойка ты хуритә хумус пөслыстә, та урыл китыгламе.

В. Игошев ювле ләвыс: «1956 тәлт тәлы порат Аментьев коләт ам хури пөслысум. Рұпата сәв ۆлыс, хури м ёмашакв пөслуңкве матрыг ат вёрмыслум. Ущты ёмашакв пөслыгласум кос, ۆсталап-сартыслум. Тох рұпитым, ам ювле аңкватасум, авиныл ам нупылум кит самыг сунсәг, кит яныг сөмыл самквег. Аҗи такем пұмшиг сунсыс, оматән нәматыр ат ләвсум, мөт нәпак вислум ос молях аҗирищ пөслуңкве та патыслум».

Тыщир ты Игушев ۆйка мирн вәнә «Озорница» нампа хуритә пөсластә.

## НЯВРАМЫТ МҘГЫС

## Яныг утыт ос мәнъ утыт



## ХОХРАИТ НЯВРАМАНЫЛ ЁТ

Нән хәхталахтэгын, нән вәңксэгын, консантыл  
тагталахтэгын, ләгантыл вортхатэгын!  
Аңквалт ёнта аскве кәсалэгын? Ты сул тәнэ  
тёрыңхонлахрищ тәра тәм ас.  
Хұлылына, аңквал тивырт ярыхтанэтэ суйты,  
йив пури!  
Мән, хохраит, нелманув юнтуп холът ошчат,  
пасыглап холът пелпыт.  
Нән нелман асквен мәгумтән, төрың хонлахрищ  
тәнэ мәгыс кон-хасумтәлын.  
Нән сыман ат этгалавет, ос вөр йив мәгыс пөлса.

## СӨВРУКВЕТ

Сөвруквет, пум кивырт үнлән, ул нёвсән!  
Саман ул рапшасән, палян ул нёвумтаптән!  
Туи, сөвруквет, нән тыт нәмхөтпан ат кәсалавён.  
Нанан хайтыгтаңкве щар ат рөви – атиңк охсарн  
лөңхын атаяве.  
Хотыют акв мāt үнлы, тав лөңх ат оныщи. Та  
сөвырн пилуңкв ат эри.

Ты потыр-охсаг «Яныг утыт ос мәнъ утыт»  
нәпакныл висагүв, Е.И. Ромбандеева мәнъщи  
латңыг толмашласаге, 1951 тәл.

## Соссаң няврамыт ёнгын утаныл



Мош мōлалнув соссаң  
няврамыт ёнгын утыт Ханты-  
Мансийск үст өлнэ «Торум Маа»  
музей колт суссылтавёсыт. Ты  
суссылтап руш лātңыл «Мир  
детства» лāvвес. Ёсың мāt яныг-  
ман няврамыт мәгыс тав мāk  
пүмшиг олыс. Тән вос вāгыт,  
манхурип ёнгын утыл пāvлың ос  
ёрңколын няврамыт ёнгасэгыт.  
Мәнъ няврамыт маснутыт тот ос  
суссылтавёсыт. Та урыл Ирина  
Ксенофонтова потыртас, нэ «То-  
рум Маа» музейт научный со-  
трудникыг рүпиты.

Севастополь үст өлнэ хум  
Александр Сергиенко няврамыт  
пōслум хурияныл мәнъ выстав-  
кан атыгласанэ. Тав «Живой жур-  
нал» нампа мāt хурит пōслым  
рүпиты.

Хурит сунсыгламаныл юи-



пālт няврамыт мōт колнакн  
вāнттувёсыт. Тән Мария Кузьми-  
нична Волдина ёт тот вāйхатасыт,  
ханты эква тāнанылн яныгмам  
тāланэ урыл потыртас. Та порат  
маньрысыр ёнгын утыл ёнгасасыт,  
ос хунь тав овыл щёс юнтуп катын  
вистэ. Ёхталам няврамытн сака  
пүмаш олыс. Юв миннёныл по-  
рат āгиришит оманыл ёт титын-  
тыг ёхталаңкв лāvхатсыт.

**Александр  
ВЬЮТКИН**

## Лүимә сәрипос

(Северная заря)  
№24 (1114), 18.12.2015

**Соучредители**  
Дума, Правительство  
Ханты-Мансийского  
автономного округа – Югры  
**Издатель**  
Департамент общественных  
и внешних связей Ханты-  
Мансийского автономного  
округа – Югры

## Редакция

Главный редактор –  
**Решетникова Р.Г.**  
Телефон (3467)33-36-82

И.о. заместителя главного  
редактора – **Узель В.В.**  
Телефон (3467) 33-23-09

Редакторы  
**Теткина Л.И., Мерова Т.С.**  
Телефон (3467)33-22-72

## Адрес редакции и издателя:

628011, г.Ханты-Мансийск,  
ул.Комсомольская, 31  
тел./факс (3467)33-17-52  
**E-mail: luima@ugracom.ru**  
Газета размещена на сайте  
**www.khanty-yasang.ru**

## Отпечатано:

ОАО «Тюменский дом  
печати» г. Тюмень,  
ул. Осипенко, д. 81-220

## Подписано в печать:

по графику 16.12.2015 г.  
в 15.00.; фактически  
16.12.2015 г. в 15.00.  
Индексы **04399, 54399**  
Тираж **1750 экз.**  
Заказ **2161**  
Цена свободная  
Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной  
службы по надзору в сфере  
связи, информационных  
технологий и массовых  
коммуникаций по Тюменской  
области, ХМАО-Югре и  
ЯНАО.

Свидетельство о регистрации  
ПИ №ТУ  
72-00795 от 23 января 2013г.